

ШКОЛЬНИКЛОН БИБЛИОТЕКА



Т. Федоров

ПОЛОШУЙТЧÖМ

КОМИ КНИЖНОЙ ИЗДАТЕЛЬСТВО

1959

ШКОЛЬНИКЛОН БИБЛИОТЕКА

Г. А. Фёдоров

ПОЛОШУЙТЧӨМ

РАССКАЗ

КОМИ КНИЖНОЙ ИЗДАТЕЛЬСТВО

Сыктывкар 1959



Portrait of [Name] [Title]
[Date]

АВТОБИОГРАФИЯ

Ме чужи 1909 воын Мылдінын (Троицко-Печорск), сиктса учитель семьяын. Первой велөдчи асланым сиктса школаын, сәсся кык во Кулөмдінын II ступеня школаын, сы бөрын — Сыктывкарса педтехникумын.

Помниҥа, кызди велөдчигөн куимысь подөн ветлі Кулөмдинсянь Мылдинөдз, көні куш печераса вөлөкыс 120 километр гөгөр. Өтчыдсө дзик өтнамон сійөс вуджлі, — лысьтчылөма тай! Сәсся ичөтджык воккөд пыжөн кывтлім Кулөмдинсянь Сыктывкарөдз. Пыжсө ньөблім кулөмдинса дядьөлысь. Асьным куим велөдчысь и кывтім. Пөттөдз сәки сюрліс нимкодясьны мян гажа вөр-ва мичлунөн. Өнөдз на казьтыла со!

Сәсся томдырйи ёна радейтлі вотчыны, вөрөд ветлыны, вуграсьны. Кыдзи и быд челядь, радейтлі, дерт, кывзыны мойдчысьяслысь мойдөм да коми олөм йылысь висьталөм, бывальщинаяс — мельничаын изөдчигөн, зимовьясын, войпукьяс дырйи. Ёна радейтлі лыддысьны. Ставыс тайө, тыдалө, и ышөдіс менө заводитны гижны педтехникумын велөдчигөн на. Сәні ми лэдзлім асьыным рукописной журнал «Бикинь», живөй да стенной газетаяс, участвуйтлім драмкружокын, духөвөй оркестрын.

Менам медводдза кывбурьяс да висьтъяс печатйтсьылісны 1928-өд воясө «Ордым» журналын. 1931-өд воын петіс медводдза книга — «Бергөдчис»

сборник, кытчө пырисны кымынкө кывбур да висът сійө воясса коми олөм йылысь. 1932-өд воын торъя книгаөн петіс медводдза повесть «Сиктса асыв». Сы бöрын гижлі ещö кымынкө повесть («Вöрса драма», «Колхозницаяс», «Трактористка Вася», «Война луньясö»), «Зелля», «Тöрича», «Тиман предгорьясын», «Юргö вөр» пьесаяс, Сöветскöй Союзса Герой И. П. Марков йылысь очерк да мукöдтор.


Войнаөдз дас во кымын уджалі Коми госиздатын редакторөн, коми учебникъяс лэдзлі. Сэк жö заочнöя велöдчи да 1940-өд воын помалі А. М. Горький нима литературнöй институт.

1941—45 воясö вöлі война вылын, бөръя вояссö — стрелковöй взводса командирөн. Волі Финляндияö, Эстонияö, Латвияö, Польшаö. Польшаын жö и ранитчылі Пултуск кар дорын фашистъяслысь ён оборонительнöй линия жугöдигөн. Госпитальысь петöм бöрын эз нин удайтчы водзö ветлыны, көть эськө зэв на окота вöлі воыны не кө нин Берлинöдз, то көть кытчöдз кө матö сы дорöдз: та бöрын война регыд пома-сис миян победаөн.

Демобилизуйтчöм бöрын бөр локті Сыктывкарö, во дас саяс уджалі Коми писательяс правлениеса председателён.

Вöвлі пионерөн, сэсса комсомолецөн. Öні — КПСС-са член.

Бөръя воясö гижі выль повесть «Кыа петигөн» — Домна Каликовалөн томдырся вояс йылысь. Судзсяс кө эбöсöй да сямлунöй, көсья тайö повестьсö пась-кöдны романöдз.



1. КУЗЬМА КОДДЗӨМА

Вөлі буретш сэтшөм кад, кор прамой гожомыс аслас онялан лунгъяснас кутис кольны нин, колхозной видзъяс вылын сигорасисны веж туруна зорөдъяс, муяс вылын гыалис нянь, а вöрын воис вотос да тшак.

— Колхозъяс мича и турун таво пунктисны!— ним-кодясёны сплав вылысь локтысьяс. Найö кыкысь, мукöдыс куимысь нин удитисны кывтлыны Котла-сөдз, ударной уджалөмөн вайөдисны местаөдз вөр, öни локтöны гортаныс.

— Сөрмим нин страдуйтнытö. Митөг тай тани эштöдчöны.

— Ми öд страдуйтим жö! Эгö видз вылын сöмын, а ва вылын.

— Э-эх!— морөстырнаныс лолалёны веж турун дука воздухсө, муноны видзяс дорті, кывзёны ытщкан машинаяслысь сяркөдчөм, чөвтысьяслысь чукса-сьөм да еджыд чышъяна нывбабаяслысь сьылөм.

Быдлаын пуө колхозной удж.

Татшөм кадө сиктысь он аддзы весь шлөнъялысь мортөс.

Сикт дорө воиганыс кылөдчысьяслы паныдасисны пионеръяс.

— Вотчины?— дозъяс серти гөгөрвоисны кылөдчысьяс да юалисны пионеръяслысь.

— Пув вотны!— гажаа горөдіс гөгрөс чужөма детинка. Чужөмбанъясыс сылөн пув розъяс кодьөсь, сьылас сэтшөм жө гөрд галстук.

— Ветлөй, чөсмасьштөй!

— Огө өд аслыным. Кывлінныд: Австрияын пө рабочөйясөс лыйлөмаөсь буржуйяс. Пувсө ми вузалам сельпоө, а деньгасө ыстам австрийскөй рабочөйяслөн челядьлы. Да аддзыланнуд кө Кузьма Сеняөс, висьталөй, мед тэрмасьө! Колим пө!.. Кыла-ад?..

— Кы-ла-ам!

Янсөдчисны өтмөдарө. Сикт дорө воысь кылөдчысьяслы дыр на кылісны челядьлөн гажа гөлөсьяс. Челядь ворсігтыр котөртісны пыр водзө веж яглянь.

Со и сикт. Шор пос. Пывсянъяс. Керкаяс. Мыччысис вичкодор — тадз пуктылөмаөсь нимсө важ вичкогөгөрсө кушинлы.

Сиктын гөгөр чөв-лөнь, сөмын пуртікасьёны туй вылын курөгъяс. Колода кодь мам гөгөрныс руксёны, котралёны польөпиян.

Туй вылын, куш му вылас пукалө кузь кияса, лёзь юрсиа мужик да катласьөмөн мыйкө сьылө.

Сы гөгөр бергалёны посни челядь. Мукөдыслөн муртса на кывйыс артмө, куш дөрөм кежсьыс ачыс котралө, а тшөтш жө эльтчө:

— Кузь Кузьма усьөма! Кузь Кузьма коддзөма!

Кузьма дугдыштліс сывны, шытьнитіс, пондыліс сувтны, но катовмуніс да пöрис тöрытья зэрысь артмём гöптö. Челядьяс полошуйтчём пыстаяс чукөрөн сывмуіны, но пыр жö бөр чукөртчисны.

— Кузь Кузьма коддзёма! Няйт гуранö водёма!

— Но! Кузьма тай талун гажөдчö!— сутш кезлö сы дорö сувтыштлісны кылөдчысьяс.

— А?.. М... мый?— Кузьма курыштіс чужёмсьыс няйтсö да шуркнитіс челядьяслы:— Н-на тіяны!..

Сійö пуксис кияс вылас, пондыліс сувтны, но эз вермы да бөр пуксис.

— Кузьма, нолтö чужйы пу кокнад, чужйы миянлы!— дөзмөдчöны челядь.— Кузьма дядь, чужйы вай!

— Чужья ме тіянос... шыть!— Кузьма бара пондыліс чеччыны, но сөмын челядьлысь серам петкөдіс. Пу кокыс мөдарö песовтчёма кодалігас, сы вöсна ачыс конйыштчис дай пöрис.

— Кузьма, лок отсалам гортад мунны,— кутісны код мортос нуөдны сплавщикьяс. Но Кузьма горөдіс налы:

— Вешйöй ме дорысь! Брысь! Энö мешайтчöй меным гажөдчыны!

— Кузьма, Кузьма! Йöзыс удж вылынöсь, а сөмын тэ тан... кодалан. Эх!— дивыштісны кылөдчысьяс да разөдчисны. Кузьма коли чöv куйлыны.

Тайö — олёма морт нин, мича сьөд синъяса, веськыд кузь ныра, сьөд зу кодь тошка. Кöсичаяс гөгöрыс юрсиясыс сылөн эзысьөн эжсьёмаөсь, кызди медводдза пужйысь öтава. Нырбордьясяныс вожалöны чукурьяс, лэччöны сингураньяс пөлöныс. Сэті чужём кучикыс чездалёма, кызди чездалö арся вöсни йи, кор чер тышкөн камөбтан. Чужöмыс пыктыштёма. Татшөм чужöмыс овлө кузя юысь йöзлөн.

Кузьмалөн синъясыс кусан öгырьяс моз сьөдвизисны сингураньясас.

— Эх-ма! И юан кулан, и он ю — кулан! А тiян-лы нимкодъ! Кузьма пö юсьöма. Чöвлö, ловъя на ме, ловъя на!— Кузьма лэптылис кыкнан кабырсö, код-лыкö сiдз ырыштчылис. Ѓырысь синва войтъяс тюрöб-тiсны, исковтiсны ныр пöлöныс, чужöмбанъяс кузя нййт да дöмаса ситеч дөрöмыс вылö.

Бокынджык, потшöс дорын вöли сулалö да видзöдö Кузьма вылö сылөн кодъ жö сьöд, но зэв жу-гыль синъяса детинка. Тайö Кузьмалөн пиыс. Сылөн пöртмасис чужöмыс: мукöддырйи кöрсылас став-нас, вомыс вежынтчылас бöрддзыны. Чужöмыс то быгыдмылас, то ставнас донавлас, лоö гöрд.

Детинка дорын пукалö еджыд морöса, ёсь ныра лайка пон.

Öзьян чужöма детинка друг разис сьылисъыс гал-стуксö, тэрыба суйис зептас да мунис код морт дорö.

— Бать! Гортö мунам. Лок ме нуöда,— шуис сийö тэрыба да сойбордöдыс кутис батьсö.

— С... Сеня?.. Лэдз, Сеня... Ачым сувта. Несчаст-ной тэ, Сеня, вот и всё!— бөръя помсö рочалис Кузьма.

— Чеччы, бать. Меным колö вотчыны мунны, ог ашты, колисны нин ёртъяс менö. Чеччы, чеччы,— тэрыба шуалис да скöрысь видзöдлывлis посни челядь вылö Сеня.

— Кузьма, чужйы пу кокнад!— дöзмöдчисны че-лядь.

Еджыд морöса пон тшöтш жö матыстчис. Но код морт дорö локны сийö эз лысьт.

— Мунам, бать, гортö. Вод да узь. Рытнас дорч-чыны ветлам. Пантиль тшöктis висьтавны — дорч-чан удж пö эм.

— Гортö?— кызкö-мыйкö вермис чеччыны Кузь-ма.— Г.. гортö ме ог мун. Мый ме сэсь эг аддзыв? Ветлам Пантиль ордö, сылөн, паразитлөн, винаыд век эм. Ловсö перъя, оз кö пöкмелитöд. М... ме сылы сэтшöм дорчöм петкöдла!

— Эн мун сэтчө, бать. Рытнас ветлам.

— Өні и всё! Эн дөзмөдчы, Сеня. А этайо коді?—
синъяссө сійө дувгөдіс еджыд морөса пон вылө,
ырыштчис кучкыны, но понйыс жергөдіс пиньяссө:

— Р-р-р-р!..

— У-у, смерть! Проклятöй!

Ая-пия ньөжйөнник пыр ылыстчисны вичкодор
кушинысь.

Кузьмалөн керкаыс вөлөсть шөрын — важиник
керкапөв. Кузьма эз сэтчө мун, а кежис шорланьө.
Сәні, шор кыр йылас, ыджыд град йөр пытшкын, кык
пу костын сулалө Пантильлөн керка. Өшинь ув йөрас
ризьялөны кык кукань. Кильчө пос тшупөд вылын
пукалө ачыс көзяиныс, шоныд пасьө тубыртчөма,
көтө эськө ывла вылас вөлі и шоныд.

— Но-но, ышманныд, йөйяс! Со өд, бөжнысө ләп-
төмаөсь, хе-хе!— ачыс аскөдыс сёрнитіс, нимкодясис
көзяин. Сійөс талун быдтор радуйтө — шоныд да
гажа поводдяе и, ладөн пуксьөм ас овмөсыс и, ризь-
ялысь куканьяс и. Радуйтіс сьөлөмсө и сэтшөмтор,
мый со мукөд колхозникьяс мырсьөны видзьяс вы-
лын, а сійө — гортас. И некод нинөм сылы оз лысьт
шуны, хе-хе... Сійө кузнеч, особөй морт.

— Эй, Пантиль! Встречайт гөстьөс!— дзирья
өдзөсө камөбтіс кулакнас Кузьма. Сеня гөгөрвоис:
өні батьсө некутшөм вынөн он нин кыскы тайө керка
дорсье; сулалыштіс, видзөдыштіс да друг уськөдчис
котөртны туй кузя, петіс сиктысь да веськөдчис яглань.
Еджыд морөса понйыс панласьөмөн котөртіс ськөд.

А Пантиль чеччис кильчө пос вылысь да локтіс
дзирья өдзөс весьтө.

— Йөймин али мый, Кузьма? Сэтшөма йиркөд-
чан, о, господи!

— Восьты, а нето лэбөда дзирьятө!— кодаліс
Кузьма.

— Но пыр инö, — Пантиль перйис дзиръя тассö да восьтис öдзöссö. — Пыр, мый сэссия тэкöд вöчан. — Ачыс гоньгöдлис юрсö ывла вылö да, кор аддзис тыр-тöмөн уличсö, бурмыштис. — Эн сэтшöма горзы, Кузьма. Талун öд уджалан лун. Абу шань кодавны йöз син водзын. Узьыштны колö тэд — рытнас дорчыны кутам. Ытшкан машинаныс жугалöма, приказ эм — асыв кежлö вöчны. Сё збыль, ог ылöдлы.

Пантиль нуöдис Кузьмаöс лэбулö да рамника сёрнитöдис.

Тайö — ыджыд юра, гöна чужöма, ляпкыдик тущаа колхозной кузнеч. Чуньясыс гырысь сьöд гыжь-ясаöсь, плавкöс помаöсь. Балябöж удвoras, сыли вылас ыджыд гөрд йөг.

— Пöкмелитöд вай, — рама шыасис Кузьма. Öшинь ув йөрö пырöм бöрын збоялöмыс сылөн друг воши. Синъяссö увлань лэдзöмөн, пидзöсьяс костас гырысь кияссö топöдöмөн сийö пукалис тарантас вылын да вугралис.

— Кысь нö пöкмелитöда? Тöрыт на юкталi да.

— Тэнад век эм. Но, öти стопка, öти стопка кöть! — васöдмöм синъяссö лэптис Кузьма да кевмысьбöмөн видзöдлис сылөн гöна чужöм вылö. — Вештыся мöдысь. Аддзан: кула татчö, сотчö морöс пытшкöсöй...

— Но, но, ладнö, пукавлы тан. Час, сюрас, гашкö, стопкаыд.

Пантиль мунис градъяс костти көбрегас, восьтис томансö.

Кузьма эз вөрзөдчыв, пыр пукалис куньом синьясөн, муртса вөрöдис лөзбöм вомдорьяссö.

Öшинь ув йöрын котралисны шылыд гöна куканьяс. Бакöстласны, курчыштасны веж турунсö да, заднысö лэптылöмөн, бара чепöсьясны ризъявны.

Керка бокун муртса-муртса лысьяснысö вөрöдöны пуяс. Чöскыд сир дукөн öвтö на дорысь.

2. СЕНЯЛЫ ЗАБЕДНО

Вотчины ветлысь челядьяс шонді лэччигөн нин мөдісны гортаныс.

Талун бура найо вотчисны — быдөнлөн дозыйс тыр, тшөтш и Сенялөн.

А вёрын пувыйс — сярвидзё гөрд, коть зырийён зырт.

Ягыс паськыд да гора, дзик жё горнича кодь.

— Ау!— горөдіс Саня, звеноын медся лөсьыда сьылысьыс.

— А-а!

— У-у!..— гөгөрбоксянь шыасис яг.

— А ме төда, мый тайо! Дедө шуо — кодьяскө пө дзебсясьоны пуяс саяс да эльтчөны,— висьталіс ичөтик Павлик.

— Де-ерт!— серөктісны челядь. Пондылісны вензыны, коді мый төдө, но буретш сэки Сенялөн еджыд морөса поныйс чошкөдіс пельяссө, дугдіс бөжсө лөгдны да лөсьөдчис чепөсийны.

Яг мөдар помысь чеччалөмөн локтіс пелыс лопт кодь пельяса, шмака бөжа көч.

Эз на удитны челядь гөгөрвоны, көні мый, а пон ав-авнитіс да лыйыштіс көч бөрся.

Көча-понья бердісны. Понлөн шочиника увтышта-лөмыс пыр ылысмис.

— Вьон көчөс вөтөдө,— кывзысьыштөм мысти шыасис Сеня. Жугыль синъясыс сылөн ловзисны, чужөмыс югдіс.

— Вьон сөмын көчөс тадзи увтө: ав, ав! А уртө оз тадз: ув-в!.. ув-в!.. Кузя нюжйөдлөмөн.

— Көчтө Вьюныд оз су,— шуис Павлик.— Көчыд пө пу йывъясті вермө чеччавны.

— О-о! Көчыд абу на лев. Левыд пө вот чеччалө,— сёрнио пырис гөгрөс чужөма Игорь, звеноса вожатй.

— Аддзылін?

— Книгагысь лыддылі. Левыд миян оз ов, кӧдзы-
дас абу велалӧма.

— А миян дедӧ квайт ошкӧс виӧма,— ошйысьӧ-
мӧн бара шуис Павлик.

— Ошкыд пӧ матын кӧнкӧ тані олӧ,— висьталіс
Сеня.— Сотчӧмысь колхозной чаньӧс чашйӧма. А тӧн-
лун кук йӧрысь мӧслысь вӧрасӧ косялӧма. Ёнӧсь жӧ
сылӧн гыжъясыс! Шашаритчӧма пӧ мӧслы шошаас
да сӧмын муралӧ. Вир-сермунтӧдзыс парсалӧма.

— Ой, ой!— дрӧгнитіс ичӧтик Павлик да видзӧд-
ліс бӧрланьыс...

Шонді лӧччис пуяс сайӧ. Ягын лои пемыд.

Вӧрса шыяс небзисны, кыдзкӧ аслысног лӧсьыда
кутісны юргыны.

— Энлӧй, ме висьтала,— чӧв олыштӧм бӧрын
шыасис Игорь.

— Войдӧрлун мамьяс ветлісны ӧмидз вотны. Мӧд-
лапӧлын ӧмидзыд да сӧтӧрыд дзик тыр! Вотчӧмаӧсь,
вотчӧмаӧсь, сӧсся и зурасьӧмаӧсь ош шӧрӧ. Вотчӧ жӧ
вӧлӧм сійӧ. Нывбабаяс садьтӧгныс повзьӧмаӧсь, дозъ-
яснысӧ эновтӧмаӧсь да пышйӧмаӧсь. А мамӧс сувтӧ-
дӧма. Сярк-сярк вӧчас пӧ гыжъяснас, чуш-чашнитас!
А синмыс пӧ векныдик да скӧр. Нитш улын сайка-
лӧма мамӧ — ошкыд тыртӧма сійӧс. Да ӧд вотчысьяс-
лысь ӧмидзсӧ кушӧдз сейӧма, вот...

Челядь восьлалӧны сӧрнитігтыр, куртӧны кокна-
ныс паччӧр кодь шоньд трӧпа вылысь буссӧ.

— Бакшасьӧм нянь кӧ пӧ сӧян, ошкыд оз паны-
дась. Повзяс.

— Дедыд висьталіс?

— Дедӧ.

— Сійӧ висьталас. Тӧндзи шуӧ: узигӧн пӧ тошкӧй
кынмис эшкынӧ. Садьми пӧ да ӧтарӧ заводитла бер-
гӧдны юрӧс — оз вӧрззы, мӧдарӧ — оз вӧрззы. Сӧсся
пӧ пӧсь утӧгӧн сывді.

Челядь сералыштисны, но ош йылысь мөвпъяс эз вунны. Унаысь аддзылөмаось ошкөс. Быд лун кодкө да кодкө казялө кок туйсө.

Яг помасис слудаон. Слуда подйын — ёль, а мөдара — понольяс, сэсся кук йөръяс, муяс. Ылын чой йылыны тыдалөны керкаяс.

Челядь гажмыштисны, долыдджык лои налы.

Сеня бергөдчис яглань, кутис чуксавны понсө:

— Съта, Вьюн, съта! Лок татчө! — Сенялөн горзөмыс шызьөдис ягысь чөв-лөнсьө. Пожөм вылысь кыпөдчис кутшөмкө лэбач да шувгөмөн лэбис юръяс весьтти.

Вьюнөс Сеня заводитис быдтыны во-мөд сайын. Аддзис пывсян сайысь, шорсьыс, еджыд морөса кутюпибс. Пантиль сийөс шыбитөма сэтчө. Сеня босьтис, чышкалис дөрөмнас, шонтыштис яй бердас да гортас катөдис.

Лым усигөн Сеня бөрся вөтлысис нин мичаник кутю. Кымын водзө, сымын шаньмис сийө. Лои ёсь ныра да негырысь ёсь пельяса лайка.

— Па-ра-зит! — кызкө код юрөн нимтис сийөс Сенялөн батыс, ырыштчис да швичнитис вөсньыдик ньөрийөн. Сэсянь найө эз кутны лөсявны. Вьюн велалис сыысь виччысьны. Кор Кузьма ырыштчас, Вьюн сэк гөгрөстас еджыд бугыльяссө да эрыштчас. Небось он сибав!

Сеня вывти ёна радейтис ассьыс быдтассө да быд чудесаас велөдис. Босьтас бөчка асык да тшөктас сы пыр чеччавны. Водзынсө Вьюнлөн некыз оз вөлі артмы. Чеччыштас да оз во, либө мөдара гатшөн турбыльтчас. А Сенялы теш — мөдысь тшөктө, коймөдысь.

Медясө нин Вьюнлы кажитчө разведчикавны да санитаравны. Тайө ворсөмыс — дзонь наука.

Шуас кө Сеня:

— Пес-с! — Колө нюзөдчыны да кыссыны рушку вылын.

Шуас кӧ:

— Шыть!— колӧ чеччыштны да ньӧв моз лы-
йыштны.

— Тэ, Вьюн, разведчик. А разведчиклы ок сьсьӧн
колӧ лоны! Мед оз аддзыны, мед оз казавны. Казя-
ласны кӧ, шковгасны, со тэд и на!— велӧдлы-
ліс Вьюнӧс Сеня.

Сӧмын ӧтчылд янсавлісны Сеня да Вьюн. Ӑтчылд
Кузьма гажаярӧн кыскис Вьюнӧс Пантиль ордӧ.
А сылы колӧ жӧ понйыд — оз вермы спокойнӧй сьӧ-
лӧмӧн пемыд войтӧ узыны. Кымыныськӧ чеччылас,
видзӧдлас ӧшиньӧ — дзонь-ӧ кӧбрег томаныс, абу-ӧ
мыйкӧ гусялӧмаӧсь сылысь.

Но Вьюн эз дыр ов Пантиль ордын, коймӧд войнас
жӧ ордчис да пышйис.

— Со, смертьыд, тан нин,— чуймис Кузьма, пон-
дыліс кутны, да кысь нӧ босьтан!

— Па-ра-зит!— видыштіс сійӧс Кузьма да ӧвтыш-
тіс кинас.

Вотчанинысь челядь локтісны ёль дорӧ да биа-
сисны. Шонді лэччис. Вылын небесаын кывтісны кок-
ньыдик кымӧръяс. Рытыввылын век на ӧзйис рытья
кыа.

Чажӧдӧмӧн сотчӧ бипур. Лӧзов тшын кыпӧдчис
слуда весьтӧдз, паськӧдчис да ньӧжйӧникӧн бӧр лэч-
чис ва бердӧдз.

Лӧсьылд чеччавны би вомӧн. Бӧрыньтчыштан,
ӧдӧбтан да шуркнитан. Но эн прӧступит. Вильдас кӧ
кокыд, ой-ой, печенча кодьӧдз чишкасян.

Чеччалыштісны челядь, пуксисны бипур гӧгӧр.
Сэсся босьтчисны сывны.

Ӑти гӧлӧс дорӧ йитчис мӧд, коймӧд. Бордъяс вы-
лын моз пионерскӧй сыланкыв кыпӧдчис слуда весь-
тӧдз, вылӧджык, мӧдӧдчис юргыны вӧр-ва пӧлӧн.

— А ёна жӧ тешкодъ Кузьма дядьыс,— ичӧтик
Павлик чеччис да кутіс петкӧдлыны Кузьмалысь ко-

даломсө.— Ёна и серам петкөдлыны кужо! Сувтас ва гоп шөрө да кутас лажъявны: этадз, тадз, этадз, тадз...

Бипур гөгөр пукалысь челядь сералыштисны Павлик висьталом выло. А Сеня жугыльмис.

Тиралыштан кияснас сийо гудыртис бисо, да вывлань качлисны бикиньяс; сэсса друг шыбитис бедьсө би пытшкө, чеччис да котөртис өтка пу дорө. Челядьлы кылис ырзөмөн бөрдөм.

Чуймисны, ланьтисны ставныс.

— Сеня?

— Сенюш?..

Сеня лэдзчысьома юрнас пу бердө, дзевөма чужөмсө да сыркьяломөн бөрдө.

— Честной пионерской кыв, Сеня, сэсса некор огө,— пөся вашнитис зөр идзас юрсиа Саня, матыстчис Сеня дорө да сетис чышьянсө.

— На, чышкысь, Сеня. Тырмас... Эн лөгав...

Ёль мөдлапөвсянь ызи-базі вуджис еджыд морөса Вьюн, пыркнитчис да локтис би дорө. Пошиктө, кывсө нюжөдөма. Гөгөртис бипур гөгөр, зургысьлис Игорлы васөд нырнас да водис Сеня бердө. Сеня сывйыштис Вьюнөс.

— Сеня, эн лөгась ми выло, эн бөрд. Ещө ёнджыка кутам ми тэкөд дружитны!— көсийысисны Сенялы пионерьяс.

3. ПОЛОШУЙТЧӨМ

Во пиын медлөсьыд кадыс — страда да вундан кад. Мед көть чорыда сюрлө сэки уджавны, а лөсьыд! Гожся лун пө вердө төвбыд!

А тайо лунас поводдяыс удайтчис вывти шань: төв пушкыштө, посныдик кымөрьяс чукөрмылөны да бөр разалөны.

— Вот эськө лун вит-квйт кӧ ещӧ татшӧм, сэсса и эштас!— шойччыштны юрнысӧ лэптылігӧн сёрнитісны колхозникъяс.

Сяркӧдчӧны вундан машинаяс колхознӧй ыб вылын. Кодъяскӧ йиасьӧны, кодъяскӧ чукӧртӧны, чумалитӧны, вӧвъясӧн новлӧны тэчасъяс дорӧ кольтаяс. А сэн тэчӧны сёрмӧ, небыда вӧдитӧны кольтаяссӧ, мед няныс оз таскайтчы.

Самӧй сэк, кор муяс вылын уджыс вӧлі ӧдӧбӧн мунӧ, луншӧр гӧгӧр, а, гашкӧ, неуна и сёрӧнджык, немвиччысьтӧг, друг да гораа сиктын бомнитіс жын-нян. Гыясӧн валнитісны ыргӧн шыяс, воисны муяс вылӧ, тӧвнырӧн шувгисны юръяс весьтті:

— Бо-ом!

— Бо-о-м!

— Б-о-о-о-о-м-м!..

Жыннянъястӧ важӧн сэтшӧмъясӧс лӧсьӧдлӧма-ӧсь, улас пыр да кӧть кок чунясь — бертчан. А бов-гӧмсьыс пельыд чуналӧ, кулӧм морт сыркунӧ.

— Сотчам!..— кодкӧ горӧдіс муяс вылын.

Быд помсянь кутісны горзыны, котӧртны. Коді вӧлі тувъялӧ суслан майӧг да колӧ вӧлі, гашкӧ, мед-бӧръяысь нин чер тышнас кучкыны, и сійӧс эз по-мав — чепӧсйис сиктлань. Вундысьяс энӧвтісны машинаяссӧ, лэдзасисны да верзьӧмӧн — у-ух! Нывба-баяслӧн юрсиныс тӧвзӧ, чышъянъясныс балябӧжа-ныс, конйыштчыласны, чеччасны да бара водзӧ.

Йӧзсӧ быттӧ тӧв пӧлыштіс, чаг-ӧгӧс моз гартыш-тіс да нуис.

Игорлӧн звено тані жӧ вӧлі чукӧртӧ шепъяс. Пионеръяс ӧктасны, кистасны мешӧкӧ да бара. А кор уджалысьяс чепӧсйисны сиктӧ, найӧ тшӧтш жӧ лы-йыштісны на бӧрся, накӧд тшӧтш и Сеня.

Вичко дорӧ Сеня воис да видзӧдӧ: йӧзыс гут-гаг мында нин, горзӧны, гыӧны, юасьӧны ӧта-мӧдныс-лысь. Некод нинӧм оз тӧд.

— Мый, мый, мый лои?

— Эй, коді бовгысьыс?

Сеня пытш моз бергалё йёз чукёрын. Сэсся кайис пу вылө да кутіс видзөдны.

Көлөкөльняын кокъяссө паськөдөмөн сулалө да кыкнан кинас бовйөдлө жыннян кывсө Пантиль. Сеня пыр жө төдіс сійөс гөна чужөмыс серти.

Шапкатөм, восьса морөса, дөлалан пась пөлаяса Пантиль оз видзөд чукөрмөм йөзыс вылө, өтарө бовгө. Сэсся друг лэччысис жыннян кывйысь, бергөдчис йөзлы паныд, лэптыліс кисө да жыннян шы ланьт-төдз на горөдіс:

— Граж-да-на! Морт вошис, Кузь Кузьма! Граж-да-на, кылад?

Сеня аддзыліс: кодъяскө кайисны көлөкөльня поскөд, мыйкө кутісны юасьны Пантильлысь, а сійө важ мозыс горзө:

— Мый?.. Мыйла звөнита? Гашкө, мися, звөн шы кузя письтас петны. Сутки саяс нин некөн абу. Корсьны колө, пыр жө быд помө мөдөдны йөзөс! Кодкөд ме кута дорччыны?

Эз кө лэччөдны Пантильөс, гашкө, мый дыра на бовгис сійө сэні, йөзсө шызьөдіс.

Сеня мыйөн кыліс батыыс вошөм йылысь, быттё дзобалис. Вөтын моз кутіс аддзыны да кывны шума йөз чукөрсө.

Батыыс збыльысь төрытсаянь эз нин волы гортас, но сідзсө сылөн абу нин первой. Ветлас лун-мөд да коркө бөр воас. Но кытчө сійө өні вермис мунны? Гашкө, ваө вөйис? Гашкө, вөрө муніс? Но мыйла не-кодлы нинөм эз висьтав?

Сенялы дум вылас уси ас вотчиганыс ош йылысь сёрнитөмыс. Лои зэв гажтөм, шуштөм. Мөвпнас быттё аддзис чаща и сэтысь батыыслысь вир-сермунөм шойсө. Со варгыльтө векныдик скөр синъяса ош, пиньясьыс вир войталө.

— Да өд Кузьма вöсна татшöма йöзсö шызьöдны эз жö ков,— кодкö, кылö, шуис Сеня дорын.

— А ме чайтi, мися, збыльысь сотчам! Кынöм висьмытöдз повзи, другö. Вöлöмкö, Кузьма вошöма.

— Кутшöм некутшöм, а морт жö вöли. Эновтны оз позь.

— Сельсöвет кöсийö корсыны мöдöдны пицала мужикъясöс вөрö. Аддзасны.

Пантильöс кöлököльнясянь лэччöдöм бöрын колхозникъяс бөр кутисны разöдчыны уджъяс вылö. Тшöтш и Сеня руныгис гортланьыс.

Горт дорас воигөн Сеня сувтис пашкыр кыз улö — неокота лои гортас пырны. Полис мам синва вылö видзöдны.

Улича кузя ыркйöдлöмөн ветлöдлис төвру. Сийö кышöдчис кыз пöвстын, довкйöдлыштіс сылысь улань помөн öшйöм увьяссö да öвтіс йөръясянь локтан чöскыд дукөн. Медсясö пуркйöдлис кöнтусь дукөн.

— Ок, батьöй, батьöй!— шога ышлолаліс Сеня.— Мыйкö лектор öмöй лои тэкöд?

4. ДОЗОРЫН

Зэв гажтöма коли тайö рытыс Сенялөн. Мамыс бöрдö, шöйтö колхоз правлениесянь сельсöветö. Сутш кезлö пыравлас гортас, лөвтыштас да бара мунас. Ягö кайисны пицала йöз — гашкö пö, лыйсьöм шы вылас петас Кузьма. И Сеня быдлаысь сикт пасьтала корсис батьсö, но сийö быттьö му пыр мунöма: абу и абу!

Талун налы — Игорлы, Санялы да Сенялы колö вöли мунны караулитчыны колхозной му вылö. Бать йывсьыс нинöм выльтор тöдмавтөг и муніс Сеня караулитчыны.

Паськыдось колхозной муяс. Ошйома на выло войся лоньыс. Шы ни тов, быттьо кулома тани ывла вылыс. Тодчыштоны визьон-визьон сулалыс чумалияс, кодьясос талун эз на удитны новлыны тэчасьясо.

Войся ыркыдыс ю вывсаень кайо берего да сэсянь гогорбок паськало, пуксьо кыз лысваок.

Вой улө кымортчыштіс.

Куим пионер да Вьон разодчыласны, кытшовтасны да бара отлаасясны. Пуксьыласны чумалидорө, сёрнитыштасны, мыйон кодөскө очсодыштас, бара чеччасны кытшовтны.

— Сеня, збыль кө вошас батыд, жаль абу?— модыс кытшовтигон юалис мам шалляс тубыртчөм Саня.

Сеня зэлөдыштіс пась вывтыс вөнялом тасмасө, ышловзис да кытчөкө бокө видзөдігтырйи шуис:

— Жаль, дерт. Мамө тай рытивбыд на бөрдис-а. Шуө, сидзи пө прөститчытөг и нинөм друг воши, гашкө пө, сэся огө и аддзылө да.

— А өні вөрад пемыд. Ме чайта, ёна сылы гажтөм.— Саня кыскис питшөгсьыс нянь да кутис көч моз водз пиньяснас курччалыштны.

— Мөйму чожө сиджө вошис,— недыр чөв олыштөм бөрын шыасис Игорьь.— Ваньөыскөд найө кайисны вөв корсьны. Воймисны. А луныс зэв лөк вөлөма, зэрны заводитөма. Ваньөыс висьталө: пемдіс пө да пемдіс! Төлыс пуяс чегьялө. Но и дзикөдз торьялөмаөсь батыскөд. А ёна жө Ваньөыс повзылөма сійө войнас. Пемыд! Зэ-рө! Откөн!.. Местаыс төдтөм. А век жө мунөма. Шуө, сувтла пө да йирмөг босьтө, быд пу сайыс ош чайтсьө. Югдытөдзыс мунөма. Асьядорыс этша сэздыштөма да вөлисти казялөма: вөлөмкө, сылөн гортланяс локсьө. Воөма. А батыс сидзи и воши, өні на оз төдны, кытчө мый лои.

— Гашкө, вөрсаыс сөйис?— повзьөм гөлөсөн юалис Саня.

— Дугды, некутшөм вөрса ни васа абу!— шуис сылы Игорьь.— Учитель висьталө: ставыс тайө пөчө-яслөн сөрөм.

Недыр кежлө челядь ланьтлісны.

— Кор бабө мойдө, ме век пола,— аслыс моз гарыштіс Саня, ышловзис, дугдіс няньсө курчавны да бөр дзебис.

— Сійө век мойдө быдсяма повзёдланторъяс: ёмаяс йылысь, гундыръяс йылысь, еретникъяс йылысь.

— Пионерлы, Саня, оз ков повны,— шуис Игорьь.

— Тэ нө дзик он пов?

— Ог, дерт.

— Войын рынышө пыралан?

— Пыра. Мыйла нө ог пыр? Вот йөйыд?

— А коді нө эськө муяс вывсьыс шепъяссө шырө? Пантиль пө шуө: омөльясыс пө тадз йирөны колхозной няньтө. Ентөг пө көдзөны, вежаватөг көдзөны, молитватөг вундөны, сы вөсна омөльясыс и сибалөны татшөм нянь дорас.

— Ха-ха-ха!— эз вермыны кутчысьны Игорьь да Сеня, вак-вак серөктісны. Игорьь пыр жө эськө кепысьсө вомаc тувъяліс да.

— Но и Саньө жө тэ! Ми кө тан мойдчыны кутам да вугравны, дерт, сэсся шептө шырасны. Час, аски та йылысь сёрнитам. Öні вай сюсьджыка видзөдөй. Сеня, тэ Вьюндкөд мун Катша мыльклань, а ми Санякөд вадор пөлөныс ветлам.

Игорь да Саня мунісны вадор пөлөн, а Вьюн да Сеня — Катша мыльклань.

Шаркөдчө кок улын көдзыд лысва, йиджтысьсө Сенялы көм пырыс, көтөдө нямөдъяссө.

Игорлөн висьтыс век на пукаліс Сеня юрын.

Кажитчө сылы — батыс öні кытшлалө пемыд вөрті, горзө, чуксалө, но йөла шыысь кындзи некутшөм öтвет оз кыв. А збыль кө нө ошкөд паныдасяс? Öні ош свадьба дыр. Сэк ошкыд ок пө скөр.

Жугыля видзёдоны Сениялөн синъясыс ылын тыдалысь яг вылө. Сэни, сэни көнкө батыс, а вот оз писёт петны.

Тадзи мөвпалігтыр сійө муніс водзө. Сылөн эз вун аслас могыс — сюся видзны колхознөй нянь.

Бөръя каднас колхозникъяс кутісны казавны нянь новлөм — вужвывсяньыс шырөны, чумалиясысь шырөны. А кодъяс? Кодъяслөн лысьтө лыбны кийс?

Сибалан унзільсыс мездысьом могысь Сения пыркнитіс юрсө, топыдджыка кизясис.

Друг Вьон сувтіс. Тадзсө сійө сувтлө, кор казялас кутшөмкө зверөс либө мыйкө лектор.

Вьонлөн бөжыс дугдіс легны, пельясыс торгөдчисны. Сения кийн көвйыс зэлаліс — Вьон лөсьөдчис чепөсйыны.

— Пс!.. Пс! — кокныдика шутөвтіс Сения. Вьон гөгөрвоис, видзөдліс сы вылө да ляпкөдчыштіс. Сідзи найө сулыштісны өти здук.

Сения корсис синъяснас, мый чуймөдіс Вьонөс. Понлөн пельяс оз ылөд, синмыс оз пөръяв. Мыйкө эм, но пемыд вөсна ыліысь нинөм Сениялы оз тыдав. Важ моз сулалөны чумалияс, асьныс часөвөйяс кодбөсь — өти, кык, куим... дас... кызь... А водзын он нин вермы лыддыны, — уна зэв.

Катша мыльк ылын на. Сения төдө: тані матын эм сөн. Сэтчө кө лэччан да вуджан мөдарас, воасны кук йөръяс. Найөс кытшовтан да петан сикт дорө.

Төрыт луннас найө, пионеръяс, волісны колхоз правлениеө. Колхозса председатель — Игорлөн батыс — пуксьөдіс найөс ас гөгөрыс пызан сайө, быдөнөс малыштіс, нюмъялөмөн шмонитыштіс, сэсса зэв збыльысь висьталіс:

— Вот мый, пионеръяс. Ті окотитанныд видзны колхозлысь нянь? Зэв бур, вывті бур! Ошка тіянөс таысь. Кодъяскө новлөны миянлысь нянь, гусявлөны.

Миян эмось эськө и асланым стөрөжъяс, да өд муяс миян уналаын, быд чумали дорө мортос он сувтөд. Войис пемыд, позьө ныр улысь пакөститны.

Өні тайө сылы дум вылас уси. А мый, збыль кө Вьюн казяліс вөрөс?

— Пс! — Сеня кокныдика вөрзөдіс көвсө. Вьюн зумыда сувтіс да, кокъяссө вылө лэпталөмөн, смела мөдөдчис водзө.

Зэлалөм көв серти, кыйөдчөмөн мунөмыс серти Сеня гөгөрвоис — Вьюн абу ылалөма: кодөскө сійө збыль кылө. Но кодөс?.. Кодөс? И Сенялөн вуніс батыс, вуніс шогыс, ставыс вуні, коли сөмын өти мөвп — төдмавны, кутны, коді ветлө колхозной му вылын вой шөр войнас. А, гашкө, көч, гашкө, ош?

Чумалисянь чумалиө котөртышталөны Сеня да Вьюн. Сувтласны, кывзыштасны, бара котөртыштасны. Вьюн кымын водзө воө, өтарө скөрмө — эргыны заводитлас, но Сеня шуас өлөдан кыв, да пон ланьтас.

И друг водзвывсьыс чепөсйисны кык морт вуджөр. Копыртчыштөмөн мунөны, но төдчө, өтиыс кузь тушаа, а мөдыс ляпкыдик. Кыкнанныслөн мышканыс гөрб не гөрб, а мыйкө эм.

Гуся мортъяс сёрниттөг тэрыба мунөны сёнлань, бытьө пышйөны Сеняысь.

Сэссия кузьыс друг конйыштчыліс да ёрччыштіс. Вьюн эрөбтіс, зэлөдіс көвсө, кутіс ас бөрсяыс кыскыны Сеняөс. Өні сійө эз нин кывзы некутшөм өлөдөм, мыйвынсьыс мөдіс увтны.

Гуся мортъяс, мыйөн кылісны понйөс, бытьө пешөр вылө тальчисны. Ичөтджык тушааыс чепөсйис да колис мөдсө. Мөдыс, кузьыс, тшөтш жө өддзөдчис. Но мыйла сійө конъясьлө? Мыйла чотө?

Котөртан статьис серти, туша мыгөрыс серти Сенялы сійө кажитчис зэв төдсаөн. Бать?..

Туша кузътаыс Сенялөн котөртис дрөж, а чужөм-банъясыс доналисны.

— Бать!— эз на удит прамөя мөвпыштны, но горөдсис нин сылөн. Ассыс гөлөссө Сеня эз төд. Ваын пөдысь мортлөн сөмын вермас артмыны татшөм шыыс.

— Бать, сувт!..

Но конъясьлысь, чотысь морт котөртис век водзө.

Өни Сеня бура нин аддзис — мышкас сылөн абу гөрб, а мешөк.


Но мый вөсна нө, батьө кө, оз сувт?

— Бать! Бать!— сэтшөм жө сибдөм гөлөсөн чукөстис Сеня.

Тадзи найө котөртисны му помөдз. Воис шор, а сәни, потшөс саяс, сән.

Сеня сувтис. Горөдны Игорьяслы али не? Ичөт-джык тушааыс (сйөс Сеня эз төд) удитис вуджны потшөссө да лэччыны сёнас.

Эз на удит Сеня прамөя мөвпыштны, кодарө мый вөчны, батьыс воис потшөс дорө, лэдзис мышсьыс ме-



шөксө, кайис потшөс вылө да мөдарвыв шыбитчыны
лөсьөдчигмоз вөлисти прамөйджыка видзөдліс бөр-
вылас.

— Бать!

— А! Тайө тэ вөлөмыд, Сеня!— тырөм лов шыөн
шыасис Кузьма, кызыштіс да лөга чөвтис:— Кут
смертьтө, эн лэдз. Пурас менө.

Вьюн чеччаліс, лөкысь эргис, бөр кокъяснас чаш-
йис мусө, и не кө Сенялөн такөдөмыс, збыльысь эськө
Кузьмалы кокас кутчысис.

Сеня матыстчис потшөс дорөдз. Судзөдчөмөн кө
эськө вермис кутны батьсө.

— Тэ нө мый тані вөчан, бать?

— Тэныд быдтор колө төдны? Зырымыд на ныр
улад уялө!— копыртчыліс Кузьма да пиньяс пырыс
сөдзөдіс пез кыв. Сенялы чужөмас пакнитіс вина дук.

— Мода босьтөма понйөн войын ветлыны! Оз
өмөй гортад овсы, несчастнөйлы? Бесыс кыскалө,
кыт оз ков!

— Тэнө, бать, вөрысь корсьөны,— сөй ёкмыль-
ясөс моз Сеня нылаліс кывъяссө. Колө эськө мөдтор
йылысь юавны, но кывйыс быттө турдөма вом пытш-
көсас.

— Ха-ха, мед и корсьөны, ёшки-мошки!— мись-
төма серөктіс Кузьма.

Кузьма бергөдчыліс мөдарө да шутөвтис, сэсся код-
лыкө өвтыштіс кинас. Сэсянь кыліс воча шутөвтөм.

— Мун гортад да эн большы, петшөрсьыс кө полан.
Кутан кө кузь кывъя лоны, кык кокөдыд гидө өшөда!

Кузьма лэптис пу коксө да кутис потшөс мөдарө
вуджны.

Өти здук, сөмын өти здук, гашкө, өтчыд лолыш-
тігкості видзөдіс гөгрөсмөм синъясөн Сеня, сэсся че-
пөсйөмөн кутчысис батыслы дөрөмас да горөдіс сійө
кывъяссө, кодъясөс өні на вөлі полө шуны:

— Бать, тэ гусясян! Тэ — вөр!

Сенялөн друг юр вежорыс кутіс путкыльтчыны, син водзыс руаліс.

Кывліс на ещö Вьюнлысь лёкысь увтöмсö. Друг Вьюныс дугдіс эравны, зэв ыджыд дойысь моз никöс-тіс пöв-мöдысь, мыйкö шмоткысис, быттö чорыдтор-йөн сылы кучкисны.

— Виа татчö!..

Татшöм медбөръя кывъяс кывліс Сеня, водзö ни-нöм нин сійö эз помнит.

5. ПАНТИЛЬ ПЫВСЯНЫН

Сён вуджём бöрын, кук йөръяс вомөн, сэсся керка мышгьяс сайті, Кузьма локтіс Пантиль пывсян дорö. Пывсян стен бердö ляскысьöмөн бура дыр сулаліс да гөгөр видзöдіс. Но ывла вылын вöлі шы ни төв, сöмын кылыштö шор валөн тюргöмыс.

Сьөлöмыс Кузьмалөн тэрыба чеччалö, быттö зільö вомöдыс петны. Вир чепсасьö ыджыд öдөн, кувгö пельясас. Көдзыд нылöм оръявлытöг пычиктö чужö-мас да мышкуас.

«Бать, тэ гусясян! Тэ — вөр!» — век на юргö пеляс желлясьöм лэчыд шы.

Дугдіс бытшкыны кочөг. Яйыс ыркалыштіс, да Кузьма вöлисти кыліс шуйга кок пөксые дойсö. Копыртчыліс да видліс кималаснас — гач кокыс чаш-мунöма, чуньясас сибдö вир.

Кузьма бура помнитö — эз кучкы писö, сöмын ырыштчыліс. Гашкö эськö и кучкыссис сылөн, да буретш пон пурис коксö.

Кузьмалы кабыр улас сэки майög сюрис. Тайö ма-йöгнас кыкысь ли куимысь кучкис понлы. Вьюн тур-быльтчис юр вывтйыс да ланьтіс. Кувмөн али эз ло

сылы, Кузьма эз нин видлы, котөртис, кытчөдз татчө эз во.

Дой өтарө чорзис, юкалөмөн кыпөдчис кок пөксянь вылөджык. Пиньсө мурч курччөмөн нин Кузьма таркнитис пывсян стенө да ружтигырйи кыссис пывсян өдзөс дорөдз.

— Тэ, Кузьма? Мый сэтшөм дыр? Эн сюр?

— Ок, эг эськө да. На мешөктө, идрав син водзысь.

Кузьма пырис пывсянө, шмоткысис-пуксис лабич вылө да кунис синъяссө. Вөтын моз сийө кывзис Пантильлысь нокошитчөмсө, сылысь гусьон сёрнитөмсө:

— Öнi няньыд, шондiбан, медся добра. Няньыд кө эм, ставыс лөб..

— Вай винатө.

— Сета, сета,— Пантиль югыд бугыля ыджыд кань моз шөйтис пывсян пытшкөстi — кыськө вайис вина, капуста, чашкаяс, сувтөдалис ящик вылө, кысталис да гөна кинас мыччис Кузьмалы.

— Ю да эн шогсы! Мый сийө миян олөмыд? Дзик нинөм, сьöлышт да тальышт! Эх, эх, казтыштла важсө да синва петө! Важөн квайт мөс видзлi, вөв дай 15 душ ыж. Ставсө лои колхозө сетны... Ю, Кузьма!.. Ола вөли, слава богу, ен вылө элясьтөг. А ёна жө лөсьыд чаньяс быдтыли, о господи, прөсти! Быд вой вөтөн аддзыла. Кокъясыс! Сьылыс трустлөн! Öнi тайö чаньнас йөз катайтчöны. Аддза да кишка-рушкуой гыркнас вөрны заводитлас. Ю, Кузьма! Төда өд: кузнечныс абу, да быть видзöны менө. А эськө не кө сийө, истинной господь, кучикөс менсьым важөн нин гугөдисны! Ю, Кузьма!

Кузьма юис чашка. Пантильлысь вашкөдчөм эз кывзы. Көнкө пыдын, юр вем пельөсас, желлясьөма өтитор: «Тэ — вөр!»

Пантиль гажмис, эз нин видзчысьомён сёрнит, а гораа. Чужо́мыс польдіс вирён, волялө. Пась соснас дугдывтөг чышкалө пөсьсө.

— Эңлы... Стой, Пантиль,— Кузьма друг восьтіс былялөм синъяссө да кутчысис Пантильлы пась соскас.

— Воштөмаөсь өмөй менө? Висьтав лючки, паразит!

Пантиль пернапасасис да мездысис Кузьма кабырысь.

— Мый тэ, Кузьма? Ме нинөм ог төд, истинной госпо́дь, ог төд. Ме ордын тэ кык лун узин, эн паявлы, гашкө, гөтырыд и воштіс да. Абу өд первойысь тай. Ю, на!

— Кывлі, вөрысь корсьоны,— аслыс моз нин шуис Кузьма да бөр кунис синъяссө. Сылы өні веськодь лои, мед көть сәсся мый, дыш лои весигтө мөвпавнысө — юрыс сьөктіс. Мед эз тіравны киясыс, Кузьма топөдіс найөс пидзөсьяс костас.

Кор Кузьмалөн юрыс личкысис морөс вылас, кор сәсся сійө став тушанас уйыштіс джоджө, Пантиль пернапасасис, босьтіс пөнарсө да петіс пывсян пөварняө. Ас бөрсяыс топыда пөдлыштіс өдзөссө. Кузьма ныргорөн шкоргис пывсян пытшкын.

Пөварня джодж пөвьяс кокниа чуктісны. Пантиль видзчысьомпырысь вешталіс вөсньыдика коялыштөм му слөйсө зырийөн да ләптіс гөбөч пөв. Сәсь ыркнитіс улис дукөн.

Гөбөч стенъяссө эжөма пөвьясөн. Джоджас мешөкьяс, ыж куяс, кутшөмкө пельсаяс. Вель уна эмбур дзебөма.

Гөбөч пемыдсө муртса югзьөдыштан пөнар би югөр водзын Пантиль нокошитчис чукөртөм көлуй чукөрас.

6. СЕНЯ ВИСЬӦ

Сенялӧн мамыс рытнас эз ветлы скӧт картаӧ ид-расьны, пыр шӧйтӧс, виччысис мужик йылысь кутшӧмкӧ юӧр. Сӧмын югдӧгас нин ойбыртыштӧс сӧйӧ. Сӧки буретш и таркнитӧсны ӧшиньӧ.

Муртса на инмӧдчылисны ӧшинь тасӧ, а сӧйӧ дрӧгнитӧс да палялис.

— Вайисны! — юр вемсӧ сотыштӧс мӧвп. Тӧрыба лӧччис пӧлатьсьыс да видзӧдлис ӧшиньӧ — ывласяныс кодкӧ ӧвтыштӧс кинас да мыйкӧ шуис.

Ӧдюклы лои ыркыд, ки-кокъясыс кутӧсны сырмыны, весиг шаллясьны эз сяммы, ӧтпӧлӧсӧн и петӧс восьтыны.

Ӧдзӧс калич вештигӧн сӧйӧ куньыштӧлис синъяссӧ, мед друг не аддзыны мужикыслысь вир-сермунӧм шойсӧ.

— Кодъяс? — юалис дзӧран гӧлӧсӧн.

— Питӧ вайим, неладнӧ лои.

Кын сюръя моз сулалис Ӧдюк да, морӧсьясас кияссӧ кресталӧмӧн, видзӧдис, кыдзи пыртӧсны червидзан писӧ, сӧсся йӧз бӧрвывтӧ тшӧтш пырис керкаас.

Сеняӧс пуктӧсны крӧвать вылӧ, ньӧжйӧник вашнитӧсны мамыслы:

— Муяс вылысь сюри... Садьтӧг куйлӧ вӧлі.

Мам локтӧс крӧвать дорӧ да, лӧкгоршӧн горӧдӧмӧн, уси пи вылас, топыда сывйыштӧмӧн кутӧс сылысь юрсӧ, заводитӧс лыддьӧдлӧмӧн бӧрдны:

— Сеня! Мый нӧ сӧсся тайӧ лои! Кутшӧм грекысь та мында шогыс уси ме вылӧ? Ой-йя да ой-йя!..

Сеня куйлис былялӧм синъяса, топӧдӧм вома. Весигтӧ лов шыыс прамӧя эз тӧдчы. Калькалӧм вомдоръяс костӧд еджвидзӧны воча топалӧм пиньясыс. Кодъяскӧ калькӧдыштӧсны сылысь вомсӧ да кисьтӧсны йӧв.

...Нель лун куйліс Сеня. Нервной припадок нюжаліс вель кузя. Нель лун садьыс эз петав, яйыс пыр вöлі дон.

Пионеръяс öчередьöн дежуритісны сы дорын. Сöмын кор Сеня восьтіс синъяссö да юрсö лэптылöмөн корис юны, вöлисти налөн личалыштіс сьöлöмныс.

Мый лои сійö войнас Сенякöд, некод эз тöд.

Игорьяс кывлісны Вьюнлысь увтöмсö да Сенялысь горзöмсö, но кор локтісны, аддзисны потшöс бокын куйлысь Сеняöс да потшöс мöдарысь Вьюнöс. Вьюн лолалö на вöлі. Мыйкö дыра чужъяеис на сійö, сэсся ланьтіс, куліс. А бокöвöй некод эз вöv.

Мöд лун помас кыськö локтіс гортас Кузьма. Вуджөр моз пырис да кайис паччөрö. Сылысь некод нинöм эз юав, быттö эз и казавлыны локтöмсö.

Войбыд Кузьма эз куньлы синсö, кывзіс пиыслысь сөрöмсö.

Мый сэтшöмторсö сöрис Сеня, мукöдъяслы дзик эз вöv гөгөрвоана, сöмын öтнас Кузьма тöдіс. Тöдіс да сы вöсна поліс лэччыны паччöрысь, поліс видзöдлыны пиыс вылö.

Сöмын вывті ёна горш косьмöмысла асывводзнас лэччис пöлатьсьыс. Керкаын вöлі чöv. Сеня узис. Мöд вой нин синъяссö куньлытöг мамыс пукаліс сы юр водзын. Муртса на дзуркнитыштіс джодж плака, Öдюк восьтіс синъяссö да шензьöмөн видзöдліс, быттö чуймис — кысь лои Кузьмаыс? Пыр сэтшöм жö шензян синъяснас видзöдіс мужикыслысь ва юöмсö да бөр локтігас шуис:

— Брöдяга! Кöнкö кыскасян, а пиыд кулан выйын.

— Шань! — чуқыртчыліс Кузьма, сулалыштіс пиыс вылö видзöдігтыр, сэсся ыджыда ышловзис да бөр кайис пöлатьö.

Коркө важөн нин, империалистическөй война бөрья воясас удайтчыліс өти сэтшөм лун, коді некор оз вун Кузьмалөн. И өні тані, пöлатяс йөжгылясигөн, бара на сылы сійө уси дум вылас.

Асывводзянь заводитісны гыпкыны пушкаяс. Швичйөдлөны юр вывті дон снарядыяс. Мукодыс зөркнитас вель матө, шуркнитас мусө, койыштас окопө. А окопын йөзыс йөжгыльтчөмаөсь, оз лысьтны юрнысө лэптыны брустверысь вылөджык.

Враг лөсьөдчис атакаө.

Сійө — пулемётчик Кузьма Чередов,— вөлі аслас пулемёт дорын. Сійө медводдзасысь на веськаліс боевөй позицияяс вылө. Мед эськө ёртьясыс эз шуны польсьөн, быд снаряд лэбигөн вөлі окнитас да содтас кутшөмкө тешкодь кыв. Сэк чайтліс, мый прамөй салдатыд нинөмысь оз пов, сылы веськодь снарядыяс гыпкөмыд. Тадзи мөвпаліс новобранец Кузьма Чередов.

Но кор неприятель вөрзис атакаө, кор взводөн взводөн кутіс вөчавны перебежкаяс, кор матөджык и матөджык кутісны локны да мичаа нин тыдавны ёсь шлема фигураяс, сэки вуніны став думьясыс. Инстинктыс кыскис эновтны пулемётсө да, нинөм вылө видзөдтөг, пышйыны тайө шуштөм местасыс ылөджык, либө лоны кутшөмкө ичөтик гагөн да пырны, дзёбсьыны медічөт турун вуж костө. Но пышйынысө вөлі сёр нин. Мездыны вермис сөмын пулемётыс, пулемётлөн оръявлытөм биыс. И Кузьма тіралысь кияснас кутчысис пулемётө, метитіс да кутіс лэдзны лента бөрся лента.

Сылы мичаа тыдаліс, кызди шыльыд поле вылө дорыв гывдісны йөз, турун моз вольсасисны. Мукодыс котөртас, котөртас да друг быттө конйыштчөмла сутшкыяс.

Кык атакаысь видзис пулемёт. Медся страшнөйыс вөлі коннөй эскадронлөн уськөдчылөм.

Рытнас, бой бõрын, Кузьма видзõдлiс ассые чужõмсõ зеркалõ торйõ да повзис: кõсичаяе дорас юрсиясые едждõмаõсь, кыдзи арся сззь асывводзõ едждывлõ борйын õтава.

Та бõрын уна сьõкыд бойясõ на веськавлiс Кузьма, коксõ воштiс, но сзкся кодь полõмсõ эз нин сзсся тõдлыв.

И õнi, танi пõлатын куйлiгас, танi, ас керкаас, ас гõтырые да пиые дорын, бара на сьõлõмсõ сылысь шымыртiс, йирис полõм. Сылы кажитчис, мый быдõн нин тõдõны мыжсõ. А гашкõ, ачыс жõ Пантиль ветлiс да явитiс, а эз кõ на явит — пиые висьталас.

Эз мыждõмысь, эз судысь пов Кузьма. Полiс йõз дивитõмысь. Тõдасны кõ — стыдыс, яндзимыс! Мый эськõ сетiс, мый эськõ сетiс Кузьма õнi, медым бõр бергõдны тайõ куим лунсõ!

Тадзи коли ещõ кымынкõ лун. Некод эз панлы ськõд сёрни, и Кузьма успокоитчыштiс.

Нельõд луннас Сеня корис юны — садьыс петiс. Сеня, кор аддзис батсьõ, дыр чукрõдлiс кымõссõ, зiлис мыйкõ уськõдны дум вылас. Вывтi ёна слабмис сийõ, чужõм кучикыс лои еджыд, пырыс тыдалана. Лõзов прутьясõн мичаа кутiсны тõдчыны сõнъясыс.

Тайõ жõ луннас пыравлiсны Игорь да сылõн батыс — колхозса председатель.

Кузьма буретш вõли пукалõ Сеня дiнын.

— Но, Кузьма, он на кõсйи уджавны? — гажаа юалiс Игорлõн батыс.

— Дорччыны õнi ог вермы. Кияс тiралõны, — бокõ видзõдõмõн шуис Кузьма, сзсся содтiс: — Кузнечаõ ме некор нин. ог мун. Энõ и ыстõй!

— А ми тэныд мõд удж индам: тэчасъяс видзны. Самõй тэныд кодь удж.

— Тэчасъяс видзны? — чуймис Кузьма да сюся видзõдлiс сылы чужõмас. Оз-õ кõсйи кыйны? Но сылõн чужõмыс эз вõв наянитана, эз тõдчы мудеритõм.

— Веськыда кӧ шуны, Кузьма, ме локтӧ тӕкӧд сӕрнитыштны. Ачыл гӧгӧрвоан. Гӧтырыд нин волӧс норасьны. Збыльысь, другӧ, тӕ кутӧн лад вылысь вошны. Помнитан, Кузьма, кутшӧм сьӧлӧмысь кутчысь-лим тӕкӧд колхозтӧ лӧсьӧдны. Помнитан, скӧт картатӧ тшупим? Тӕ сетӧн пывсян кертӧ, ме рынышӧс, мукӧдьяс тшӧтш жӧ сетӧсны. Кыскалим арнас ӧтлаӧ дай тшупим. А мыйта кӧсийӧмыс вӧли миян! Кӧдзалӧн нин ӧмӧй? Вунӧдӧн?

— Да, помнита. Эз кокни вӧв лӧсьӧдны колхознымӧс,— мӧвпалӧгмоз шуис Кузьма.

Налысь сӕрнисӧ кывзыштӧм бӧрын Сеня кыпӧдчыштчылис вольпасысье да небыдика инмӧдчылис кинас батыслы пидзӧсас!

— Бать, дугды сӕсся юнытӧ. Дугды.

Кузьма бара ышловзис. Тӧкӧтӧ нюммунӧгмоз малыштӧс писӧ да, морӧс бердас топӧдӧмӧн, окыштӧс чужӧмбанас.

7. АРСЯ ВОЙЫН

Кӧдздӧдис. Арся зӕрьяскӧд вежа-веж кутӧс усъыштавны шыдӧса лым. Мукӧддырйи немвиччысьтӧг кыпӧдчас еджыд кымӧрттор, паськалас да паськалас, сӕсся ыджыд тӧв сорӧн ваяс кос лымсӧ, син и пель тыртас туйӧ веськалӧм мортлысь.

Вундӧм эштӧм мысти колхоз пыр жӧ кутчысис вартны. Тӕчасьяс дорсянь асыводзсянь да сӕр рытӧдз кылис вӧла машиналӧн гурӧдчӧм.

Сеня бура нин справитчис тайӧ кад кежлӧ; ывлаӧ нин петавлывлис. Тадз жӧ мукӧддырйи шер бӧрын бара на веськӧдчӧ дзугсьӧм нянь.

Сеня некор ӧтнас эз ов — кодкӧ да кодкӧ сы дорын век эм. Либӧ пионерьяс воласны, ваясны газета-яс, журналгьяс, либӧ батыс сы дорын пукалӧ.

Ая-пиа кутісны лөсявны. Батыс бара лои мелі, эз нин ю. Луннас, кор прөст, пыр Сеня дорын: вердө, сёрнитөдө да гажөдө. Мукөддырйи шегъясьöны либө дөведясьöны.

Отпыр Сеня пукаліс крөвать вивсянь кокъяссө лэдзөмөн да рисуйтчис дзоля пызан вылын. Батыс дө-мис көтіяс.

Тайö лунас батыс торъя нин меліа сёрнитіс, синъясыс гажаа ворсісны. Тавой сійö лөсьөдчис. петны колхознöй тэчасьяс видзны.

Сеня рисуйтис понйөс, сэтшөмөс жө, кутшөм вөлі сылөн Вьюныс.

Кор понйыс эштис — лои кока и юра и бөжа,— Сеня мыччис батыслы да юаліс:

— Артмөма абу, пап?

Кузьма видзөдліс пон вылө, сэсся Сеня вылө да кызөктис кабыр пытшкас, быттьö мыйыськө сылы лои яндзим.

— Лөсьыд лоөма. Дзик прамөй пон кодь.

— Вьюнөс рисуйті,— гөгөрвоөдіс Сеня. Сэсся локтіс батыс дорө, өшөдчис гыррдзаяснас сылы пидзөсьяс вылас да чужөмас видзөдігтыр юаліс:

— Бать, коді виис менсьым Вьюнөс?..

Батыс бура дыр чөв оліс, сэсся ышловзис морөс-тырнас:

— Ме виі, Сеня, ме мыжа тэ водзын!— и висьта-ліс ставсө, кызди мый вөлі. Сеня кывзис зумыштчөмөн. Зэв вөлі жаль Вьюныс.

Пемдыштөм бөрын Сенялөн батыс муніс тэчасьяс дорө караулитчыны. Батыс мунөм бөрын Сеня дыр на эз вермы унмовсьны. Кор дзик нин пемдіс, кор мамыс локтіс идрасянінысь, сөйыштис, водіс да унмов-сис, Сеня гусьöник кутіс пасьтасьны, муртса-муртса кывмөн дзуркнитіс өдзөсөн да петіс ывлаө. Сійö ду-мыштіс батыс дорө ветлыны.

Бывлаын съод арся вой. Кылө кушмөм кызд пулөн нъорьяснас шарөдчөмыс. Бырлан да друг кыськө локтан төв жалиттөг пыркөдө росмөм кызд пуяс.

Сеня топыдджыка кизясис, төдса туйөд кайис ыб вылө, көть эськө пемыдысла омөля аддзис туйсө.

Тэчасъяс дорө вотөдз на Сенялы бөрвывсянныс кыліс кодлөнкө гусьөн кызөмыс.

Бөрывитіыс локтысь морт эз казавлы рыныш бердө ляскысьөм детинкаөс, и пыр муніс водзө тэчасъяслань.

Сеня тыдавтөм вуджөрөн тшөтш жө котөртіс сыланьө да сувтіс медматысса тэчасъяс сайө.

Мыйкө дыра нинөм сылы эз кыв, сөмын шутьляліс төв да шарөдчис идзас. Весигтө батыс некөн эз тыдав.

Друг мөдарсянныс кыліс горөдөм:

— Коді сэн вуджрасьө? Юрыд донтөм лои али мый?

— Ме, Кузьма, эн повзы, хе-хе. Гажтөм эз на босьт?

Кык мортлөн сёрниыс ылысмыліс. Найө кежисны төв сайө. Сеня кытшовтіс тэчассө. Оні бара лөсьыда сылы тыдалісны кыкнанныс.

Батыс сулаліс пищальсө киняулас кутөмөн,— өти кийс сылөн затвор вылас. Мөд мортыс вөлі Пантіль.

Пантіль павтыртіс шабур пөласө, сёрнитігмозыс мыйкө кыскис да чургөдіс Кузьмалы.

— Шонтысь. Эг на өд вунөд друг мортөс. Йирмөг босьтө төв йылад. Войыс дженьыдджык лөб, шонтысь «сюсь ванас».

— Сэсся мый висьталан?

— Ми өд тан кыкөнөсь. Войыс пемыд, йөзыс узьоны. Перьялам кольтаяссө тэчасъыс, шырам да бөр тэчам. Висьтала тэд, чөртыс оз казав. Эн и пов, другө.

— Вешы!— горөдіс Кузьма да друг бөрвыв петитчыштөмөн гольснитіс затворнас. Войся пемыдсө чашнитіс би, өттшөтш кувнитіс лыйөм шы — төвру нөбө-

дiс сiйoс сиктлань. Здук кeжлo югдылiс гумлавыв, тe-
часъяс, вартoм идзас чукoр да машина, а сы дорын —
повзьoм синъяса, паськалoм вома, тшoг чужoма Пан-
тиль. Кок улас сылoн туплясис жугалoм вина доз.

— Йoймин oмoй, Кузьма! Ен тeкoд, шыбит пи-
цальтo, шыбит.

— Гoгoрвои ме тeнo, паразитoс!— пыдiсянь кы-
лан гoлoсoн горoдiс Кузьма да бара лыйис вылo.

Мoдысь лыйoм чард мoз чапнитiс вoйся пемыдсo,
и сиктлань лeбисны тревога шыяс.



БИБЛИОТЕЧКА ШКОЛЬНИКА

Геннадий Александрович Фёдоров

ПЕРЕПОЛОХ

на коми языке

Оформление М. Безносова

Редактор *В. Попов*

Техн. редактор *И. Оплескин*

Сдано в набор 21/IV-59 г. Подписано к печати 29/IX-59 г. Формат 84×108¹/₃₂—0,5625
бум. листов, 1,845 печ. лист. (Уч.-изд. лист. 1,41). Тираж 3000. Заказ № 1655. Ц01813.
Коми книжное издательство. Дом печати. Цена 50 коп.

г. Сыктывкар, Республиканская типография Полиграфиздата
Министерства культуры Коми АССР

3

50 к.

С 11-1961 года

Цена р. 5 к.

СУДЗОДОЙ ДА ЛЫДДОЙ КНИГАЯС,
КОДЪЯСОС ЛЭДЗИС
КОМИ КНИЖНОЙ ИЗДАТЕЛЬСТВО:

В. Чисталёв. ВО ҒӨГӨР КЫТШОВ-
ТӨМ. «Школьниклөн библиотека» се-
рияысь. 1959 во, 36 стр., доныс 40 көп.
Коми кыв вылын.

Я. Рочев. СУРОВОЙ ШКОЛА. «Школь-
никлөн библиотека» серияысь. 1959 во,
36 стр., доныс 50 көп. Коми кыв
вылын.

Н. Носов. ФАНТАЗЁРЪЯС. 1959 во,
144 стр., доныс 3 шайт 45 көп. Коми
кыв вылын.

Е. Пермяк. ВӨСНИ СТРУНА. 1959 во,
108 стр., доныс 2 шайт 40 көп. Коми
кыв вылын.

